

四庫全書

子部

欽定四庫全書

子部

赤水元珠卷二十九

詳校官太醫院吏目臣 栗桂

編修臣 倉聖脈覆勘

總校官編修臣 王燕緒

校對官助教臣 卜惟吉

謄錄監生臣 汪存璜

欽定四庫全書

赤水元珠卷二十九

明 孫一奎 撰

外科門小引

生生子曰外科最重者莫如癰疽最急者莫如喉風疔腫  
患之者生死立見其餘瘡癰皆可緩圖非若上三証急  
若風火也究其受病之源經云營氣不從逆於肉理乃  
生癰腫又曰膏粱之變足生大疔又曰六府不從留結

為癰又曰諸痛痒瘡瘍皆屬心火大抵皆氣血虛弱蘊鬱熱毒調養失宜之所致也予固非專門外科蓋常咨訪推究頗知治法大體茲採前人所論癰疽証治載列卷首疔瘡腫瘍次之陶節庵癰疽經薛立齋外科精要二書實外科權輿業是者不可不使之隨囊檢視能熟此二書鮮有敗事予固特舉歷試有功者揭出以告同志云

瘡科總論

夫癰疽瘡瘍者皆由氣血不和喜怒不時飲食不節寒

暑不調使五臟六腑之氣怫鬱於內以致陰陽乖錯氣血凝滯而發也亦有久服丹石燥熱之藥熱毒結深而為癰疽也夫癰疽之疾多生於膏粱富貴之人以其平昔所食肥膩炙燂安坐不勞嗜慾無節以致虛邪熱毒內攻煎熬氣血而成也癰者壅也大而高起屬乎陽其脉浮數疽者沮也平而內發屬乎陰其脉沉數瘡者總名也癰者有頭小瘡也經云諸痛痒瘡皆屬心火蓋心主血而行氣若氣血凝滯挾心火之熱而生癰疽之類

也然所感有淺深故所發有輕重大小之不同也六腑積熱騰出於外肌肉之間其發暴甚皮腫光軟侵裏廣大者癰也五臟風毒積熱攻注於肌骨其發猛惡初生一頭如痞瘤白色焦枯觸之而痛應心者疽也熱發於皮膚之間浮腫根小不過二三寸者癰也夫癰發於六腑若燎原之火外潰肌肉疽生於五臟沉澀難療若陶室之燧內消骨髓癰則易療惟難將息而遲瘥疽則難療而易痊夫諸瘡之中惟背疽疔瘡最為急症其次莫如腦疽腸

癰喉癰之類亦其急者也至若瘰癧懸癰痔漏諸瘡之類其症可緩而治也又有疥癬癰瘡風疔之類雖云俱屬瘡類而其輕重緩急自有不同也夫癰疽之疾要須察其是虛是實是冷是熱或重或輕對証用藥無失先後次序凡人年四十以上頭項鬚頤背脊腰脅或筋骨之上所視不見之處稍有瘡癰便不可輕易待之若視之急慢以為常疾每見至微至著喪命者多矣便宜速急治之庶幾得救譬之救火初起則易救至於燎原之

勢不可撲滅矣其理亦由是也凡瘡未破毒攻臟腑一毫熱藥斷不可用此是先後次第之妙訣也夫瘡有五善七惡不可不辨若動息自寧飲食知味一善也便利調勻二善也膿潰腫消色鮮不臭三善也神彩精明語聲清亮四善也體氣和平五善也如煩躁時嗽腹痛渴甚泄利無度小便如淋一惡也膿血大泄焮痛尤甚臭惡難近二惡也喘粗短氣恍惚嗜卧三惡也未潰先黑久陷面青唇黯便汚者四惡也肩項不便四肢沉重五



惡也不能下食服藥而嘔食不知味六惡也聲嘶色脫唇鼻青黑面目四肢浮腫七惡也更有氣噫痞塞欬逆身冷自汗無時目瞪耳聾恍惚驚悸語言頻錯皆惡証也五善見三則差七惡見四必危若五善并至則吉而安七惡全見必危而死矣已上所論大綱其諸証候治法列論於後

### 五發癰疽論

夫五發癰疽者謂發背發腦發鬚發眉發頤是也人之

一身氣血周流而無間稍有壅聚莫不隨所至而發焉  
又豈特五者哉夫發背者乃五臟風熱六腑邪毒灌於  
筋骨之間發於經絡之內榮衛虛損氣血衰殘所致也  
其發初如粟米大最不可輕忽後必大發也若初起紅  
腫高起者後必不為害故曰外形如粟中可容谷外貌  
如錢裏可著拳如惡毒深滿膿血交粘用藥可痊若膿  
臭穢無絲此血敗氣衰陽絕陰盛必難療理治初起或  
陰塌不起便可用艾多灸或隔蒜灸之如痛灸至痒如

痒灸至痛此最妙法也若疽瘡已成亦可用火針烙開  
瘡口則易治也若瘡高起為癰則易治平陷為疽則難  
治癰疽形症已具前總論中茲不復論至如發腦發眉  
發鬚發鬚發頤地位不同然皆由內臟伏陽結滯邪毒  
上壅隨其經絡地分而發也其諸發癰初起皆宜宣散  
熱毒要須看人元氣虛實而治之庶不悞矣若元氣實  
者亦可用大黃之劑泄去毒氣或用漏蘆五香連翹之  
類皆可用內托十宣之類補之亦有陰瘡寒塌不起雖

云用灸然亦不可服寒涼之劑亦宜以煖藥溫之全在活法不可執一也其敷貼洗藥具方于下隨症用焉  
外科精要曰癰疽既灸即服藥以護腑臟如護心散凡有疽疾早進數服使毒氣外出而無嘔吐之患否則咽喉口舌生瘡或黑爛如菌若瘡發四五日之後宜間用別藥治之

又曰護心散乃解金石發疽之藥若發熱焮腫作渴飲冷而嘔者宜之若發熱焮腫作渴飲湯而嘔者不宜用

之蓋脾虛停痰或寒邪內侵或痛傷脾胃宜用六君子湯若喉舌生瘡或口乾作渴或小便頻數宜用六味丸大凡諸瘡作嘔若飲冷便秘是熱毒也黃連消毒散解之飲冷便和是胃火也竹葉石膏湯清之懶食飲湯是胃虛也補中益氣湯補之大便不實喜飲熱湯是脾胃虛寒也六君子加炮薑以溫之常見脾胃虛弱者用護心散反致胃寒嘔惡其喉舌生瘡乃腎水枯涸虛火炎上其証甚惡急用加減八味丸多有得生者

又曰癰疽嘔逆是毒氣冲心非脾胃之冷當服內托散  
楊氏云鼻衄初愈不曾表汗毒在經絡則背大疽自肩  
下連腰脇腫硬如石其色紫黑以涼藥投之終夜大嘔  
連進托裏散嘔止瘡潰赤水淋漓四十日而愈又有患  
癰者痛過輒嘔服托裏即止今有疽病不服此藥者故  
引楊氏之言以解世人之惑

華佗癰疽瘡腫論

夫癰疽瘡腫之作皆五臟六腑蓄毒不流非獨因榮衛

壅塞而發也其行也有處其止也有歸假令發於喉舌者心之毒發於皮毛者肺之毒發於肌肉者脾之毒發於骨髓者腎之毒發於下者陰中之毒發於上者陽中之毒發於外者六腑之毒發於內者五臟之毒故內曰壞外曰潰上曰從下曰逆發於上者得之速發於下者得之緩感於六腑則易治感於五臟則難瘳又近骨者多冷近膚者多熱近骨者久不愈則化成血蟲近膚者久不愈則傳氣成漏成蟲則多痒少痛或先痒後痛成

漏則多痛少痒或不痛不痒內虛外實者多痛少痒血不止則多死潰膿則多生或嘔逆無度飲食無時皆癰疽使然症候多端要當詳治

薛立齋曰瘡瘍生蟲乃肝經風熱其成漏乃元氣虛弱其出血乃脾虛有火其潰膿乃元氣充實至於嘔逆等症屬脾胃虧損所致當調補元氣庶保無虞

背疽其源有五

一天行二瘦弱氣滯三怒氣四腎氣虛五飲冷酒食炙



燀服丹藥

治癰疽用藥大綱

一初患癰疽便服內托散以免後來口舌生瘡仍用騎竹馬或隔蒜灸

一服五香連翹湯如大便踈快即止仍量人虛實

一癰疽潰後宜服排膿內補散若嘔逆木香湯下

一癰疽初作便宜灼艾及麥飯石膏塗四圍中留口出毒如瘡小通傳之既潰用神異膏貼之

一癰疽已潰日用猪蹄湯淋洗將愈之際三日一次

一癰疽將斂宜用神異膏如毒未盡不可遽用生肌之劑

一癰疽將安宜用加味十全湯補其氣血庶肌肉易生  
一背疽多先渴而後發或先疽而後渴不救者多矣若  
服加減八味丸非特杜絕渴疾抑亦大滋氣血生長  
肌肉

一癰疽嘔逆有二一因初發不服內托散伏熱在心一

因脾氣不正伏熱在心者則心煩身熱焮腫作痛宜用內托散三兩服之脾氣不正者則不煩熱或聞穢氣作嘔宜用嘉禾散如有寒熱用不換金正氣散五更初兼服山藥丸以補腎

癰疽用香藥調治論

伍氏曰氣血聞香則行聞臭則逆大抵瘡瘍多因營氣不從逆於肉理鬱結為膿得香則氣血流行故服五香連翹湯萬金散金粉散凡瘡本腥穢又聞臭觸則

愈甚若毒入胃則咳逆古人用之可謂有理且如飲食調令香美以益脾土養其真元可保無虞矣

五發癰疽通治方

漏蘆湯 治一切惡瘡毒腫丹瘤瘰癧疔腫魚臍五發癰疽初覺一二日便如傷寒頭疼煩渴拘急惡寒肢體疼痛四肢沉重恍惚悶亂坐卧不寧皮膚壯熱大便閉濇小便赤黃並皆服之 妊婦勿服

漏蘆 白欬 黃芩 麻黃 去節 枳實 去白炒 升麻 芍

藥

炙甘草

朴硝

各一兩

大黃

二兩

右每服三五錢看虛實用水煎空心熱服

五香連翹湯

治諸瘡腫初覺一二日便厥喉咽塞發

寒熱

乳香

木香

木通

大黃

各一錢半

連翹

沉香

獨

活

桑寄生

丁香

射干

升麻

麝香

另研各一錢

甘草

五分

薑三片水煎不拘時服

托裏護心散 治諸疔腫發背曾經汗下毒氣攻心迷

悶嘔吐而痛可服二三服

乳香

一兩

藁豆粉

四兩

和勻每服三錢甘草湯調服

神仙蠟礬丸 此藥不問老幼皆可服之服至一兩已

上無不取效最止疼痛不動臟腑委是神效活人不

可勝數

白礬

明亮者一兩研

黃蠟

七錢鎔化提起待少冷入礬末不住手攪勻

右衆手丸如梧桐子大倘蠟冷不能丸以滾湯頓之便軟每服二十九漸加至三四十丸白湯或酒吞下如未破即內消已破即便合如服金石發動致疾更用白礬末一兩匙頭溫酒調下亦三五服見效有人遍身生瘡狀如蛇頭服此亦效諸書皆稱神奇但一日之中服近百粒則方有功此藥能防毒氣內攻蓋能護膜也切不可欺其淺近而忽之始終服過半觔必能萬全瘡愈後服之尤佳

一方治蛇咬只鎔化白礬乘熱滴傷處痛即止毒氣即  
趕出立見效驗要知白礬大能解毒也

千金托裏散 治一切瘡腫發背疔毒若氣血虛而不  
能作膿或潰後膿清痛仍不減最宜服此便能排膿  
止痛

黃耆

半兩

厚朴

防風

桔梗

各二兩

連翹

二兩

木香

沒藥

各三錢

乳香

二錢

當歸

五錢

川芎

白芷

芍藥

官

桂 人參

甘草

各一兩



右為細末每服三錢酒一大盞煎三沸溫服

十六味流氣飲 治無名惡瘡癰疽等症

川芎 當歸 芍藥 防風 人參 木香 黃芪

官桂 桔梗 白芷 枳殼 厚朴 烏藥 紫蘇

枳殼 甘草

各一錢

右作一帖水煎食遠服

內托羌活湯 治尻臀生癰堅硬腫痛大作

羌活 黃柏

酒製各二錢

防風 歸尾 藁本 連翹

蒼朮

陳皮

炙甘草

錢各一

肉桂

分三

黃芪

一錢半

水一鍾酒半鍾煎八分食前服

清心內固金粉散

一名金花散

專治惡瘡熱盛焮

痛煩躁作渴此藥解毒

辰砂

另研

白茯苓

人參

甘草

錢各三

蒙豆粉

四兩

雄黃

一錢冰片

白芫仁

朴硝

錢各五

麝香

與冰片各一錢另研

右以參苓芫薹為末入研藥和勻每服一錢半蜜

湯調下

麥飯石膏方又名鹿角膏

白麥飯石

其石顏色黃白像麥飯團者研細末聽用

鹿角

要活者自解者不用截作二三

寸長炭火內煨令烟盡為度研為細末

白斂

為細末

右將麥飯石用炭火煨紅以好米醋淬之如此煨  
淬十次研為極細末每用二兩白斂末二兩鹿角  
灰末四兩同入乳鉢乳令無聲方有效驗若研不  
細敷上作痛若研得極細如眼藥一般極能止痛  
排膿收口量藥末多寡用經年好米醋入銀石器

內煎令魚眼沸却旋旋入前三味藥末在內用竹  
篦子不住手攪熬一二時久令稀稠得所傾出磁  
盆候冷以紙蓋密勿惹塵灰每用時先用猪蹄湯  
洗去癰瘡上膿血至淨以故帛挹乾以鷲翎拂藥  
膏塗敷四圍凡有赤處盡塗之但留中心一竅如  
錢大以出毒氣膿血如瘡未潰能令內消如已潰  
則排膿如湍水逐日見瘡口收斂如患瘡久肌肉  
腐爛筋骨出露用舊布片塗藥以貼瘡上但肉膜

絕穿亦能取安洗瘡勿以手觸動嫩肉仍忌口氣  
及有腋氣之人并月婦皆令忌之 此方但得好  
帶蓋鹿角好麥飯石精虔修合勝用他藥多矣仍  
可熬取好米醋一大碗候逐日用藥於瘡上俟乾  
便以鵝毛蘸醋拂潤勿令緊也初用須一日一洗  
換十日後兩日一換

排膿內補十宣散

一名十奇散  
一名內補散

治癰疽瘡癰未成者

速散已成者速潰敗膿自出無用手擠惡肉自去不

用刀針服藥後其痛頓減效驗如神

人參

當歸

黃耆

各二兩

甘草

川芎

防風

厚

朴

薑汁炒

苦梗

白芷

薄桂

各一兩

右為末每服三錢酒調下日夜各數服以多為妙  
服至瘡口潰更服為嘉不飲酒人濃煎木香湯調  
下然終不若酒力之勝或飲酒不多能勉強以木  
香湯兼酒調下亦可

乳香黃耆散

治一切惡瘡癰疽發背疔瘡痛疼不可

忍者或未成者速散已成者速潰不假刀砭其惡自下 又打撲損傷筋骨疼痛並皆治之

黃耆 當歸 川芎 麻黃去根節 甘草 人參 芍

藥各一兩 嬰粟殼蜜炙 陳皮各一兩 乳香 沒藥各五錢

每服五六錢水煎服

黃耆湯 治一切瘡腫癰疽並宜服之

黃耆 川歸酒洗各一兩 大黃 芍藥 陳皮 炙甘草

錢各五

右加生薑三片水煎服

托裏內補散 專治一切惡瘡潰爛出膿之後宜服之

人參 川歸 川芎 白芍 甘草 白芷 防風

白朮 茯苓 官桂 黃耆 金銀花

各等分水煎服

護心散

治毒氣冲心嘔吐

又名不  
二散

炙甘草

硃砂

飛各  
一錢

菴荳粉

炒二  
錢

為細末作一帖白湯調下



當歸連翹散 清熱解毒通潤大小便

當歸 連翹 梔子仁 芍藥 金銀花

各一兩

黃芩

五錢

右每服五錢水二鍾煎七分空心溫服如欲通大便加大黃二錢待藥煎將熟入之再煎一二沸服之

托裏散 治一切惡瘡發背疔疽便毒始發脉洪絃實數腫甚欲作膿者

當歸

括萎根

一錢半

大黃

三錢

皂角刺

牡蠣

朴硝

連翹

各一錢半

金銀花

赤芍藥

黃芩

各一錢

水酒各一鍾煎服

乳香止痛散 治一切瘡腫疼痛不止

乳香

沒藥

各一錢

丁香

五分

栗殼

白芷

陳皮

炙

甘草

水煎服

加味當歸飲子 古云諸瘡皆屬心火火鬱則發之

當歸

生地

升麻

錢各五

防風

二錢半

荊芥穗

何首

烏

錢各一

柴胡

白芍藥

川芎

羌活

黃耆

錢各三

紅花

蘇木

甘草

錢各一

每服五錢生薑三片煎或沐浴取微汗效速使血

氣通暢服藥應效

托裏溫中湯 治瘡為寒癰而內陷者膿出清解皮膚

涼心下痞滿腸鳴切痛大便微澹食則嘔氣短促吃

逆不絕不得安卧時有昏憤

丁香 沉香 茴香 陳皮 益智仁各一錢 木香一錢

半羌活 良薑炮三錢 黑附子炮去皮臍四錢 炙甘草二錢

薑三片水煎服 忌生冷

猪蹄湯 治一切癰疽并諸腫毒消毒氣去惡肉凡瘡有口便須用此湯洗

黃芩 白芷 赤芍藥 川歸 羌活 生甘草

露蜂房有蜂兒者各等分

先将獾猪前蹄兩隻重一觔只用白水三升煮軟

將汁分作二次澄去面上油并下肉渣每次用藥  
一兩投於汁中再用文武火煎十數沸去渣以故  
帛蘸湯溫溫徐揩瘡上死肉惡血隨湯而下洗淨  
訖以帛拭乾仍避風忌人口氣吹之有狐臭人及  
月婦猶犬並不宜入病人房中洗瘡切忌手觸洗  
疽之方甚多惟此方極效其用露蜂房甚有理蓋  
以毒攻毒也

麥門冬湯 癰疽潰後膿水不絕

麥門冬 黃耆 五味子 人參 官桂 當歸

遠志 白苓 芎藭

各一兩 炙甘草 三錢

薑一片 棗二枚 水煎

四虎散 治發疽腫硬厚如牛皮按之痛

天南星 草烏頭 半夏

生用 狼毒

各等分為細末 醋蜜調敷 留頭出氣

內托散 諸腫毒惡瘡一服立愈 便毒尤效

大黃 牡蠣

各五錢

甘草

三錢

括萎仁

二兩 如無用 山梔子亦可

右分三帖水煎服

鐵井欄 治無名腫毒背疽以此圍之留口出氣

芙蓉葉

重陽前收

蒼耳

端午前收  
燒存性

為末以蜜水調上

五香湯 諸瘡入腹托裏

丁香

木香

沉香

乳香

各一兩

人參

另加

麝香

三錢

嘔惡者去  
之加藿香

右為細末每服三錢水一盞煎六分空心熱服

總錄聖惠千金外臺治諸瘡腫方中皆載此方大  
同小異大抵專治毒氣入腹煩悶氣不通者其餘  
熱結昏昧口燥咽乾大便硬小便澀者未可與服  
止痛當歸湯 治腦疽發背穿潰疼痛

當歸 黃耆 人參 官桂 芍藥 炙甘草 生

地 各一  
兩

每服五錢水煎服

金銀花散 發背惡瘡托裏止痛排膿



金銀花

無花藤葉代之四兩

甘草

八錢

分為三帖酒水各半煎服

拔毒散 治熱毒丹腫遊走不定

寒水石

生用

石膏

生用各四兩

黃栢

甘草

各一兩

為細末新汲水調掃之或油調塗之或紙花上攤貼以涼水潤之

寸金丹 二名返魂丹三名再生丸四名追命丹六名

來甦丹七名知命丹八名得道丸非人勿示若有人

患毒身未爛者與三九服之嚥下便活如口噤幹開  
研化灌之下喉立生治發背腦疽癰腫遍身附骨腫  
痛先覺時飲水口中煩渴發熱四肢沉重身體壯熱  
射香分乳香 輕粉 烏金石 雄黃 狗寶 沒

藥

錢各一

蟾酥

錢二

粉霜

黃蠟

錢各三

硃砂

錢五

鯉魚胆

乾用

狗膽

錢各一

頭男胎乳一盞金頭蜈蚣

七條

全用

右俱為細末以黃蠟熬成膏子和勻為丸菴豆大  
小兒丸如芥子大每服一丸病重者加三九白丁

香七枚研爛新汲水調送下被蓋出汗勿令透風  
凡服藥後喫白粥瓜瓞就睡大妙頭瘡腫痛不過  
三服

定痛托裏散 一切瘡腫疼痛不可忍如年少氣實先  
用疎利後服此藥

川芎 川歸 乳香 白芍藥 沒藥 官

與乳香各一錢半

桂一錢 御米殼去筋膜炒二錢

水煎服

柞木飲子 發背癰疽已成未成並宜服之

乾柞木葉

四兩

乾荷葉心蒂

萱草根

甘草節

地

榆

各一兩

右為末每服五錢水煎服早晚各進一服

內托千金散

癰疽發背腦疽乳癰諸瘡癰未成者自

散已成者即潰

人參

川歸

黃耆

川芎

防風

白芍

官桂

桔梗

白芷

甘草

括萎

金銀花

各等分痛甚者加當歸乳香沒藥芍藥每服七八錢水煎臨服加好酒半盞溫服日進二三服若瘡口有黑血出及有汗出者此藥之功也

牛膠飲 截癰疽惡瘡發險處服之使毒氣不傳於內不傳惡症

牛皮膠

通明好者淨洗  
乾秤四兩為則

右用酒一碗入膠納重湯頓令膠攪勻傾出更浸酒隨意飲盡若善飲者以醉為度亦用酒煎却浸

以白湯飲盡為佳此法活人甚多

國老膏

一切癰疽俱發預期服之能消腫逐毒使毒

氣不內攻功效不具述

大甘草

有粉者  
二斤

槌令碎河水浸一宿揉令漿汁濃去渣再用綿濾  
過銀石器內慢火熬成膏以磁罐收之每服一二  
匙無灰酒侵入或白湯亦可不拘時服曾服丹劑  
燥藥亦解之或微利無妨

遠志酒 一切癰疽發背惡毒有死血陰毒在中則不  
痛敷之則痛有憂怒等氣積而內攻則痛不可忍敷  
之則不痛或熱蘊在內熱逼人手不可近敷之即清  
涼或氣虛血冷潰而不斂敷之即斂 此乃韓大夫  
宅用以救人極驗若七情內鬱不問虛實治之必驗

遠志

米泔浸洗  
去心苗

右為細末酒一盞調藥末三錢遲頃澄清飲之以  
渣敷病處

忍冬酒 癰疽發背初起時便當服此不拘症發何處  
及婦人乳癰服之皆有奇效外以麥飯石膏及神異  
膏塗之其效若神 忍冬藤生取一大握以葉入砂

盆內爛研入好酒或生酒尤佳調和稀稠得所塗敷  
四圍中心留一大竅出氣仍用忍冬藤五兩用木槌  
微搗不可碎

甘草節

一兩

右入砂瓶內水二碗文武火慢慢煎至一碗入無  
灰好酒一大碗再煎十數沸去渣分為三次服一



日服盡如病勢重一日夜再進一劑服至大小腸  
通利藥力乃到 若無生者用乾者終不及生者  
力大而效速其功勝於紅內消

神仙截法 癰疽發背一切惡毒預服此藥毒氣不內  
攻可保無虞

真麻油

一斤銀石器煎十  
數沸傾出冷用

右以無灰酒兩碗侵入油重湯溫稍熱通口急服  
一日盡之為妙或疾發數日者亦宜急服之佳此

法乃吳侍御家云三代用之無不驗又聞獵者云  
凡悞中藥箭急飲麻油則藥毒不行後於西山親  
見一人被虎箭穿股呌號不忍急以此灌之良久  
遂定又聞鄭學諭曾用之效

黃耆丸 治因用針砭傷其經絡白濃赤汁逗留不止

生黃耆

錢八 川歸

錢三

木香

沉香

肉桂

乳香

各一錢

右諸香並不見火為細末用菴豆粉生薑汁煮糊  
為丸梧桐子大溫水吞四五十丸

忍冬丸 療渴疾既愈之後須預防發癰疽大宜服此

忍冬藤根莖花葉皆可用以無灰好酒浸以糠火煨  
一宿取出晒乾入甘草少許研為細末以所浸酒打  
麴糊為丸梧桐子大每服五十九至百丸不拘時酒  
飲任下 此藥不特治癰疽大能止渴并治五痔諸  
瘻等疾

援生膏 治諸般惡瘡及癰癰鼠瘻纔起者點破即愈

血竭 乳香

沒藥

各一錢

蟾酥

輕粉

各三錢

雄黃

五錢

麝香

五分

右用蕎麥稽灰或真炭灰一斗三升淋灰湯八九碗用栗柴或桑柴文武火煎作三碗取一碗收留二碗盛於好磁器內候溫將前七味藥研為極細末入灰湯內用鐵瓢或桑柳枝攪再以好風化石灰一升入藥灰湯內攪勻取出候冷過宿盛於小白磁罐內凡遇諸惡瘡點在當頭一日二次次日又一次瘡頭食破約五分血水出為妙恐日久藥

乾將前收留灰湯入之

烏龍膏

一名烏金散

一切腫毒癰疽收赤暈

木鼈子

去壳

半夏

各二兩

小粉

四兩

草烏

五錢

右於鐵銚內慢火炒令轉焦為細末出火毒再研以水調稀稠得所敷毒四圍留頂出氣或以醋調亦得

透膿散 諸癰疽瘡及貼骨癰不破者不必刀針以此點之不移時其膿自透累驗

蛾口繭子

出蛾有口者

右燒存性以酒調服切記只用一枚不可多用如

用二三枚即有二三口也慎之此方絕驗勿忽

通門散 一切瘡疽無頭腫痛

山梔子

三錢

大黃

二錢

牡蠣

炒五錢

地龍

去土三錢

炙甘草

五錢

每服六七錢水煎服以利為度

乳香拔毒散 一切瘡腫癰疽消毒

黃芩

各二兩

黃柏

地骨皮

乳香

沒藥

各二錢

為末凉水調攤貼腫處效

立效散 發背諸癰癤瘰癧乳癰與前方間服神效

皂角刺

不用枯者  
剉而久炒

生粉草

二兩

乳香

五錢

沒藥

一兩

括萎

五枝

取肉  
炒

右為末每服二錢無灰酒調下

灸法 癰疽初發小點一二日間急以大蒜頭橫切如  
錢貼其中心以小艾炷灸之五壯而止若形狀稍大  
以黃稭紙蘸酒全貼着先乾處為筋脚於脚處灸之

或兩處先乾皆灸但五七壯而止 又法屈指從四  
圍尋按遇痛處是根就此處重按深入自覺輕快即  
此灸之更於別處灸若腫大即搗蒜餅焙乾蘸法醋  
灸熱更換頻罨或以熨斗火於蒜上熨之逐次更換  
熱餅頻熨如覺患處走散以綿帛覆蓋勿令氣泄俟  
少間敷藥凡癰疽腫大如鰲之形須看頭向上下先  
灸其前兩脚次灸其尾或紅筋走緊而長從盡處灸  
之須留頭并後兩脚勿灸設盡灸之不惟火氣壅聚



彼毒無所走散反攻入裏也倘辯認不明以白芷三

分 漢椒

桑白皮

錢各一

連根葱白十根

新水煎入酸醋半盞淋洗少頃其筋自見可以辯

認頭尾

萬病解毒丸

癰疽發背魚臍毒瘡藥毒草毒挑生蛇

毒獸毒諸惡瘡病

五倍子

錢五

山荳根

山慈姑

一兩

全蝎

錢五

紅牙大戟

錢七

麝香

錢一

續隨子

取仁去油取

霜各半兩

硃砂

雄黃

錢各二

雄黃

錢各二

右件先以前五味入木臼搗羅為細末次研後四  
味夾和糯米糊丸分作三十五丸端午七夕重陽  
臚日淨室修合每服一九生薑蜜水磨下井水浸  
研敷患處解毒收瘡救病神妙硃砂雄黃乃瘍醫  
五毒攻乃瘍中物也

加味八味丸 降心火生腎水治諸渴疾癰疽未發前  
已瘥後渴症通用

熟地黄

焙二兩

山藥

微炒

山茱萸

蒸取肉焙各一兩

辣桂

去粗皮五錢

澤瀉

截作塊酒蘸磁器盛  
甑內蒸五次剉焙

牡丹皮

焙白茯苓各八錢五

味子

慢火焙乾  
研兩半

右為細末煉蜜候冷和丸如梧桐子大每服三十

丸空心鹽湯下

神仙太乙膏

治癰疽及一切惡瘡軟癰不問年月深

淺已未成膿並宜治之蛇虎傷蜈蚣犬咬傷湯火刀

斧所傷皆可內服外貼如發背先以溫水洗瘡淨軟

綿拭乾却用緋帛攤膏藥貼瘡即用冷水下血氣不

通溫酒送下赤白帶下當歸酒下咳嗽及喉閉纏喉  
風並用新綿裹膏藥置口中含化一切風赤眼用膏  
捏作小餅貼太陽穴後服以山梔子湯送下打撲傷  
損外貼內服橘皮湯腰膝痛者患處貼之內服鹽湯  
送下唾血者桑白皮湯下諸痛先以鹽湯洗淨諸血  
量大小以紙攤貼每服一丸如櫻桃大蛤粉為衣其  
膏可收十年不壞愈久愈烈一方久遠瘰癧同上瘰  
瘡鹽湯洗淨貼酒下一丸婦人血脈不通甘草湯下

一切瘡癰并腫痛及疥癩別煉油少許和膏塗之

玄參 白芷 當歸 赤芍藥 肉桂

去粗皮

大黃

生地黃

各一兩

右剉碎用麻油二觔浸春五夏三秋七冬十火熬  
黑色濾去渣入黃丹一觔青柳枝不住手攪候滴  
水中成珠不粘手為度傾入磁器中以磚蓋口掘  
子窖埋陰樹下以土覆三日出火毒欲服丸如鷄  
頭子大

神異膏 治發背癰疽諸般惡瘡癰其效如神治疽疾

先以麥飯石膏塗敷俟其瘡根脚漸收放徑寸大脚  
用神異膏貼之收口此藥隨其人病深淺取效合時  
不可與婦人鷄犬猫厭穢物見之

玄參

半兩

杏仁

去皮尖切一兩

露蜂房

淨炒一兩用有蜂兒者為妙

男子亂

髮

洗淨焙乾五錢

綿黃耆

三分

全蛇退

鹽水洗焙五錢

黃丹

飛細五兩

右用真麻油一觔用髮入銀鉚中文武火熬候髮

焦鎔盡以杏仁投入候變黑色用好綿濾去渣再

將所熬清油入鉚內然後入玄參黃芪慢火熬一  
二時取出鉚子安冷爐上半時久火力稍息旋入  
露蜂房蛇退二味將柳枝急攪却移鉚放火上不  
住手攪慢火熬至紫黃色用綿濾過復入清油在  
鉚內乘冷投黃丹急攪片時又移鉚於火上以文  
武火慢火熬不住手柳枝攪千餘轉候藥油變黑  
色滴水凝結成珠則是膏成就若珠子稀再熬  
少時必候其得所然後磁器內收封待用或恐偶

然火熬太過稍硬難用却少將腦熬麻油在內以磁器盛封蓋於甑上蒸乘熱攪調收用膏藥熬成了須連所盛磁器置淨水中出火毒一晝夜歇三日方可用日換二次夜換一次熬此膏藥極難於火候須耐看火緊慢火猛則藥中火發不特失藥性又傷人面目救助不及千萬謹戒膏藥方甚多不下數十治疽之神無出此方千金不換杖瘡尤妙



萬金膏

治癰疽發背諸般瘡癤從高墜墮打撲傷損

脚膝生瘡遠年癰瘡痔漏一切惡瘡又云專治發背  
神妙不可具言或初覺若做瘡用牛皮膠令稀稠得  
所如藥化攤在毛頭紙上於初覺處或有做瘡處貼  
次用軟布帕子二條於釀米醋內煮令熟漉出互相  
於膠紙上乘熱蒸熨不可令布帕冷布帕二條不可  
都齊漉出常留一條於醋內煮候蒸熨得一條冷時  
却取醋內煮者熨之俟冷却又於醋內取熱布蒸熨

庶幾常得熱布替換即易見效若瘡痒乃是藥攻其  
病須忍痒不止直候膿出將盡即濃煎貫衆湯候溫  
洗去膠紙次日依前更洗若上有膿又如前法蒸熨  
雖連數日蒸熨不妨但要瘡中膿盡瘡乾為度然後  
用生肌紅玉散摻在瘡上即以萬金膏貼每日一上  
或兩上每用再蒸熨並如前先鋪膠紙於瘡上了亦  
如前用貫衆湯洗去膠紙

龍骨 鱉甲 玄參 黃栢 草烏 黃連 烏賊

魚骨 黃芩 白芨 白薇 白蘞 豬牙皂角 木鼈子

當歸 白芷 川芎 厚朴去粗皮 槐枝 柳枝各四寸長

二十條乳香另研 沒藥另研各半兩 黃丹水飛淨炒過 清麻油

四斤入前藥熬赤色  
去粗秤淨油三斤

右除乳沒丹外餘藥入油內慢火煎候白芷焦色  
去粗入黃丹一半不住手攪令微黑色更入黃丹  
仍攪待滴入水中成珠不粘手為度攪溫下乳沒  
末攪勻磁器盛用時量瘡大小攤紙貼之治諸惡

瘡加自然銅肉桂各一分一方無當歸

磨風膏 治頭面五發瘡腫疥癬等疾及湯泡傷磨風  
止痛滅癰痕

白附子 白芍藥 白茯苓 零令香 白芨 白

薇 白芷 白檀 藿香 升麻 細辛 黃耆

甘草 杏仁

去皮尖  
各一兩

腦子

括萎根

一兩

大括萎

二兩  
去皮

黃臈 芝麻油

右前十四味剉油內浸百日於臈日木火炭上銀

石器內煎至白芷微黃色離火入括萋二味着內煮  
百沸重綿濾去粗再慢火上煉油香下削淨黃蠟鎔  
開為度傾在磁器內收貯上搽腦子密封旋用磨風  
塗之

金絲萬應膏 治癰撲傷損手足肩背并寒濕脚氣疼  
痛不可忍小兒脾疳瀉痢咳嗽不肯服藥者

瀝清

二斤半

威靈仙

二兩

草麻子

二百枚 去皮殼

黃鵠

二兩

木鼈子

二十八枚 去壳切片

沒藥

乳香

各一兩

麻油

夏二兩 春秋各四兩

右先將瀝清同威靈仙下鍋熬化以槐柳枝攪候焦黃色重綿濾過以瀝清入水盆候冷成塊取出秤二觔淨再下鍋鎔開下麻油黃臈草麻子泥不住手槐柳枝攪勻須慢火滴入水中不粘手扯拔如金絲狀方可如硬旋再加油少許如軟加瀝清試得如法却下乳香沒藥末起鍋在炭火上再用槐柳枝攪數百次又以粗布漉下水盆內扯拔如金絲頻換水却用小銚盛頓如落馬墜車被傷疼

痛處穴上灸熱貼透骨肉為驗連換熱水數次浴之則熱血聚處自消小兒脾疳瀉痢貼肚上咳嗽貼背心上

洗藥神硝散 專治癰疽潰爛臭穢

朴硝

一兩

蛇床子

二兩  
研破

右二味和勻每用三錢水一碗煎三五沸通手洗瘡上用後藥搽之

聖效散 收斂瘡口

黃栢

一兩去粗皮炒赤色

穿山甲

一兩炒黃色

栴櫨

木香

各半兩炒黃色

右為末每用少許候大膿出盡洗淨方可乾搽瘡

上

阿膠飲 一切癰疽癰毒

牛膠

剉蛤粉炒成珠

粉草

各一兩

橘紅

五錢

分三帖水煎服

家藏神驗血竭膏

當歸

酒洗

白芷

大黃

黃連

黃栢

木鼈子

去殼

皂



角 杏仁 露蜂房 各一兩 乳香 沒藥 血竭 各三兩

血餘

一兩

飛丹

一斤

麻油

二斤

右除乳沒血竭餘藥入油熬焦去渣熬至滴水成珠下丹將柳樹棍不住手攪軟硬得中入乳香等攪勻即成膏矣 薛立齋云血竭取其以毒攻毒也若惡瘡已去毒氣既消宜用神效當歸膏以其生肌續筋也

李氏云癰疽不服內托散及失宣通內毒以致咽喉口

舌生瘡甚則生紅黑菌害人甚速當用琥珀犀角膏治之向有患此症者諸法不效與此藥一日而安

琥珀犀角膏

真琥珀

犀角

辰砂

飛

茯苓

各二錢

冰片

二分半

人參

三錢 酸棗

炒二錢

右為末煉蜜丸彈子大每服一九麥門冬湯化下

李氏云癰疽不服托裏之藥熱毒內攻喉舌生瘡甚至黑爛當服犀角散以解其毒

犀角屑 玄參 升麻 黃耆 赤芍 麥門冬

去心

生粉草

當歸

各一兩

大黃

微炒三兩

右為粗末每服三錢水煎

薛氏云前方破血降火內疎之劑也若其脉沉寒大便秘結發熱作渴喜飲冷者屬熱蓄於內方可用之若其脉虛浮大便不結發熱作渴畏飲冷者乃屬血虛於外可用當歸補血湯若尺脉洪數而無力發熱作渴小便頻數者屬腎水不足虛火上炎宜用加減八

味丸蓋此症多因腎水虧虛火上炎故也

內托黃耆丸 治針砭所傷惡寒發熱膿水不止肌肉  
不生瘡口不斂

黃耆

八兩

川歸

酒洗三兩

肉桂心

木香

沉香

各一兩

藁豈

末

四兩

乳香

右為末以薑汁打棗豈末糊為丸白湯吞

薛氏云若肌肉傷而瘡口不斂用六君子湯以補脾胃  
若氣虛惡寒而瘡口不斂用補中益氣湯以補脾

肺若血虛發熱而瘡口不斂用四物參朮以滋肝脾若膿多而瘡口不斂用八珍湯或十全大補湯以養血氣經云脾主肌肉如前藥未應但用四君歸著以補脾胃更不應乃下元陽虛急用八味丸以壯火生土若脉數發渴者難治此真氣虛而邪氣實也李氏云近有數人病背疽或先寒後熱先熱後寒或連日或間日必嘔痰大汗而止皆用柴胡常山不應乃脾氣不正復感寒邪痰盛而作遂先用不換金正氣

散次用排膿內補散木香湯三日而愈 若外邪既去而仍嘔不止宜用六君子湯以補脾胃 大凡胃氣虛而作嘔者必喜溫熱毒內攻而作嘔者必喜冷治當辯之

家傳不換金正氣散 治感冒風寒或傷生冷或瘴癘或疫癘

蒼朮

米泔浸炒四兩

厚朴

薑汁拌炒四兩

炙甘草

二兩

橘紅

三兩

藿香葉

半夏

薑制二兩

木香

濕紙包煨

人參

白茯苓

各一兩

右每服五錢加薑棗水煎服

凡疽愈後忽發渴而不救者十有八九或先渴而患疽者尤為難治急用加減八味丸可免前患如能久服永不作渴亦無疽症且氣血皆壯真神劑也

薛氏云前症屬腎水枯涸虛火上炎口乾作渴飲水無度或舌黃作裂小便頻數或痰氣上壅煩躁不寧或二三年先作渴飲水或口舌生瘡兩足發熱多痰或瘡愈三年而口乾作渴小便頻數急用前藥多有復

生者能逆知其因預服前丸可免此患若兼手足厥  
冷真陽虛也宜服八味丸大凡瘡後審其腎水不足  
用加減八味丸中氣虛弱用補中益氣湯氣血虛弱  
用十全大補湯陽氣虛寒加薑桂如不應用八味丸  
加減八味丸

熟地黄

八兩

乾山藥

山茱萸

去核

五味子

炒各

肉桂

一兩

牡丹皮

白茯苓

各三兩

澤瀉

切片

蒸五

焙三兩

兩

右煉蜜為丸梧子大每服八十丸五更未言語前



白湯下

黃耆六一散

黃耆

六兩

粉草

半生半炙一兩

右為末每服二錢空心日午白湯調下不應作大劑水煎服

薛氏云忍冬丸解熱毒消渴之藥也六一湯補氣虛作渴之藥用之無有不驗

五味子湯 腎水枯涸口燥舌乾

五味子

麥門冬

各一兩

黃耆

炒三兩

人參

二兩

炙甘草

五錢

右每服五錢水煎服

此方乃滋其化元之劑設

腎水既涸虛火上炎燥渴須佐以加減八味丸

李氏云疽疾將安每日當服十全大補湯以補氣血宜與排膿內補十宣散相間服

薛氏云潰瘍屬氣血俱虛補之固當若患腫瘍而氣血虛弱者尤宜預補否則潰而不斂凡大病之後氣血未復多致再發若不調補必變為他症而危或悞以

為瘡毒復發反行政伐速其斃也深可戒諸

神效托裏散 治一切癰疽發背腸癰

黃耆

鹽水炙

忍冬葉

當歸

各五錢

粉草

二錢

右酒煎服渣敷患處此乃托裏消毒之良劑也

神效瓜蒌散 治乳癰瘰癧與立效散相間服

黃瓜蒌

一枚杵碎

當歸尾

甘草節

五錢

沒藥

另研一錢

右用酒三碗煎一碗分三次服未成即消已成即

潰

立效散 治癰疽瘰癧

皂角刺

半斤  
炒赤

粉草

二兩

乳香

沒藥

另末各  
一兩

黃瓜萋

五個

連皮  
研碎

右每服一兩好酒煎服

薛氏云二方治癰疽瘰癧解毒止痛通用之良劑也若  
瘰癧寒熱焮痛腫赤乃肝經氣病當清肝火以養肝  
血若寒熱既止而核不消乃肝經之血亦病也當養  
肝血以清肝火若初如豆粒着於筋肉色不變內熱

口乾精神倦怠久不消潰乃脾肝虧損當健脾土培  
肝木外臺秘要云肝腎虛熱則生癰矣病機云癰癰  
不係膏粱丹毒因虛勞氣鬱所致補形氣調經脉其  
瘡自消若誤下之必先犯病禁經禁矣

綠雲散 治五發毒瘡於背腦或手足 此方治金石  
發疽果有神效

鳳尾草

形如鳳尾葉背有金星多乾一兩

粉草一錢

用酒一碗煎三五沸入冷酒一碗飲之以醉為度

立效

清涼膏 治一切瘡瘍膿去後用之

當歸

二兩

白芷

白芨

木鼈子

去殼

黃栢

乳香

白薇

白膠

各五錢

黃丹

淨五兩

麻油

十二兩

右入油煎黑去粗入黃丹以槐柳枝不住手順攪

再煎成膏乃下乳香等藥

碧油膏

止痛排膿灸後用此

桃枝

柳枝

桑枝

槐枝

乳香

血竭

各五錢

黃

丹

淨四兩

右用麻油十兩照常法煎成膏入乳香等任貼

神效酒煎散 治一切瘡瘍其效如神

人參

沒藥

當歸尾

各一兩

甘草

括萎

一枚半生半炒

右以酒三碗煎二碗分四服粗焙乾加當歸末一

兩酒糊丸桐子大每服五十九以酒下 善消毒

活血

經驗方 治金石發癰

黑鉛一斤 甘草三兩

右用酒一斗置磁器內先以甘草置在一邊另將鉛鎔投酒一邊取鉛再鎔仍投九度取酒飲醉寢即愈

治癰疽用生甘草為末酒調二錢服連進數服自消前方乃清熱消毒之劑若因膏粱積熱金石蓄毒血氣壅滯者最宜如脾胃虛血氣痞滯者不宜概用恐胃寒故也



升麻湯 肺癰胸乳間作痛嘔吐膿血腥穢

升麻 苦梗 薏仁 地榆 黃芩 赤芍 丹皮

甘草

各等分水煎服

穀道前後生癰謂之懸癰 粉草一兩截斷以澗水浸  
潤炙令透內細剉無灰酒煎服有人患此已破服兩  
劑瘡即愈

崔氏云治手足甲疽或因修甲傷肉或因損足成瘡潰

爛上脚用綠礬置鐵板上煨色赤如金者為真沸定  
取出研末以鹽湯洗搽之

薛氏云前症即脫疽也此方固有良驗尤當調元氣為  
善大抵此症先醇酒炙煨膏粱厚味傷脾或房勞虧  
損腎水故有先渴而後患有先患而後渴者若色赤  
作痛自潰可治黑色不潰不治色赤作痛者先用隔  
蒜灸活命飲托裏散再用十全大補湯加減八味丸  
色黯不痛者隔蒜灸桑枝灸亦用十全大補湯加減

八味丸則毒氣不致上侵元氣不致虧損庶可保生  
亦有因修手足口咬等傷者若元氣怯弱或犯勞事  
外塗寒涼內服尅伐損傷脾胃患處不潰色黯上延  
亦多致死重者須解去當以脚刀轉解周髀輕拽使  
筋隨骨出而毒得洩否則毒筋內斷仍上潰雖去無  
益且偏僻之處氣血罕到藥難導達況攻毒之劑先  
傷脾胃反損元氣不若灸法為良重者須解毒為善  
故孫真人云在肉則剗在指則截雖親之遺體不忍

毀傷然不如是則勢必至於夭歿非體親之心也況患處已壞雖解不痛又何憚而不為乎女子亦有此患多因鬱怒虧損肝脾所致治法與前同

疔瘡

多生四肢發黃疤中或紫黑必先痒后痛先寒后熱也

夫疔瘡者皆臟腑積受熱毒邪氣相搏於經絡之間以致血凝滯注於毛孔手足頭面各隨五臟部分而發也其形如粟米或疼或痒以致遍身麻木頭眩寒熱時生嘔逆甚則四肢沉重心驚眼花蓋疔腫初發時

突起如疔蓋故謂之疔含蓄毒氣突出寸許痛痒異常一二日間害人甚速是尤在癰疽之上也內經以白疔發於右鼻赤疔發於舌根黃疔發於口唇黑疔發於耳前青疔發於目下蓋取五色之應五臟各有所屬部位而已然或肩或腰或足發無定處如在手足頭面及骨節間者最急其餘猶可緩也凡疔瘡皆宜刺瘡中心至痛處又刺四邊十餘刺令惡血出乃敷藥藥力方得入於針孔中則佳若不刺破藥力不

能入又看口中頰邊舌上有赤黑如珠子者是也諸  
疔名目雖多其治法略同初起宜以針刺出毒血將  
蟾酥丸或迴疔錠子之類從針孔紐入之上用膏藥  
貼之仍服飛龍奪命丹發汗及五香連翹漏蘆湯之  
類并清心之劑蓋諸瘡皆屬心火心清則毒氣消散  
而易愈矣

追毒丹 取黃去疔頭追膿毒立效

蟾酥

用酒化

蜈蚣

酒炙

硃砂

白丁香

各一錢無此味加巴豆

雄黃

錢輕粉

錢一硃砂

二錢為衣

巴豆

七粒去殼不去油

右為末用酒打糊為丸麥子大兩頭尖入於針破口內用水沉膏貼之後用膏藥及生肌藥追出膿血毒物又有如黑陷漏瘡者四圍死敗肉不去不生肌者不可治也亦用此藥追毒去死肌敗肉生新肉愈矣小者用一粒大者加用之病輕者不必用針只以手指甲爬動於瘡頂上安此藥水沉膏貼之其瘡即時紅腫為度去其敗肉為妙用之神

驗

水沉膏 將白芨末放在盞內用水沉下去用紙貼之  
如用膏不可用生肌藥 凡用拈點之藥用此膏圍  
貼則不傷好肉

追疔奪命丹 能立取效驗使腫內消

羌活 獨活 青皮君 防風君 黃連 赤芍 細辛

甘草節 蟬退 殭蠶 金線重樓 澤蘭 金銀

花各等分



有膿加何首烏白芷 要通利加青木香大黃梔子

牽牛 毒在下加木瓜

各等分

右每服五錢先將一貼加澤蘭金銀花各一兩生薑十片同藥搗爛好酒釀之熱服不善酒者水煎仍以酒水各一盞半生薑十片煎至熱服之汗出為度病退再加大黃二錢煎熱取利一兩次去餘毒為妙 此方以藥味觀之甚若不切然效速如神萬不失一百發百中如有別証再出宜隨加減

治之 若心煩嘔吐加甘草節錢一藁荳粉錢一酸漿

水下 嘔逆惡心加乳香荳粉甘草湯下

飛龍奪命丹 治疔瘡發背腦疽乳癰附骨疽一切無  
頭腫毒惡瘡服之便有頭不痛者服之便痛已成者  
服之立愈此乃惡症藥中至寶病危者服之立安萬  
無失一係神人之秘方不可輕忽

血竭錢一蟾酥乾者二錢酒化乳香 沒藥 銅錄 硃砂為衣

各二錢雄黃錢三輕粉五分膽礬 寒水石各一錢麝香 冰

片

各五  
分

海羊

二十一條  
即蝸牛

蜈蚣

一條  
去頭足  
酒炙

右為末先將海羊連殼研如泥和前藥為丸菴豆  
大或加酒打麵糊每服二丸先用葱白三寸爛嚼  
吐於手心男左女右將藥包在葱內無灰酒三四  
盞送下避風處被蓋出汗約人行五里許再以熱  
酒數盃催之以汗出為度

服前藥二丸即消如汗不出重者再服二丸汗出即效  
三五日重者再進二丸即愈如疔走黃過心者難

治汗出冷者亦死 如病人不能嚼葱搗碎裹藥以  
熱酒吞下 服此藥後忌服冷水冷物黃瓜茄子猪  
魚鷄鵝羊濕麵一切發毒動風之物不可食之及月  
婦狐臭人見之此藥活人萬萬誠外科匙鑰

拔黃藥 用真取蟾酥飛羅麵為丸梧子大可將一丸  
放在面前舌下即時黃出

百二散

又名護心散

治發疔煩躁手足不住發狂者急宜

服之

方在癰疽門

蟾酥膏

治疔

新蟾酥以白麵黃丹搜作劑圓如麥

顆大用指甲爬動瘡上插入重者針破瘡頭用一粒  
內之仍以水沉膏貼

回瘡錠子

治疔瘡大妙

草烏頭

一兩蟾酥

巴豆

七箇  
去皮

麝香

一字

右為細末麵糊和就捏作錠子如有惡瘡透疔不

痛無血者用針深刺至痛處有血出以此抵之上

用膏貼疔瘡四畔抵之其疔二三日自然拔出此

藥最宜緊用 此証大抵與傷寒頗類其中亦有  
可針鎌砭射出血者亦有久而敗爛出膿者其間  
變異百端不可不慎也

內托連翹散 疔瘡出時皮色不變不疼痛按搖不動  
身發寒熱便是此瘡有水疔魚臍疔紫燕疔火疔諸  
般疔瘡如瘡黃於黃上用針刺仍服內托散自然消  
散

連翹 生地 白芷 赤芍

各一兩

大黃 山梔

去頂蒂

薄荷

各七錢

朴硝

二兩

黃芩

五錢

甘草

一兩半

每服一兩燈心竹葉各十莖水煎服其人喘加人參少許大病只三四服愈如服下心煩嘔者以護心散止之

護心散

甘草

五錢

藁豈粉

一兩

為末分作二次酸蘆水下

破棺丹 治疔走黃不止

川歸 赤芍藥 山梔仁 牽牛各二兩半 連翹 牡蠣

金銀花 紫花地丁各一兩半 京三稜 甘草各二兩 大黃

半 三兩

右為末煉蜜丸彈子大每服一九童便化開服忌

飲酒及生冷

治疔走了黃打滾將死者 牡蠣 大黃 木通 山

梔子 金銀花 連翹 牛蒡子 地骨皮 乳香

沒藥 括蕒 皂角刺 每服五錢壯實者加朴硝



用水一碗酒半碗煎服此乃救命仙方也

鐵粉散 治冷疔瘡經久不效用此大妙

多年生鐵

炒過三錢

松脂

一錢黃丹

輕粉

各五分

麝香

一分

右為細末清油調塗瘡口立效

走馬赴筵丹 治疔瘡

沒藥 乳香

礞砂

礞砂

雄黃

輕粉

各三錢

冰

片

一分麝香一分

右為細末蟾酥汁和為丸黃米大每服一九溫酒

送下立效

金砂散 取疔瘡

道人頭

微炒一兩  
即蒼耳子

礪砂

三錢半

雄黃

三錢

蟾酥

以多為妙

右將瘡四圍刺破以少油調藥末置於瘡內緋帛封之數日疔自出

蒼耳散 治一切疔腫神效

蒼耳草根莖苗子但取一色便可用燒存性研細末用好米醋米泔澄淀和如泥隨瘡大小塗上厚二分

乾即易之不過十度即拔根出須針破塗之加雄黃尤妙

蒼耳與白梅研爛貼疔上拔去根毒氣入腹嘔吐者搗蒼耳汁飲之立效

治疔最有效用蟬退殭蠶為末醋調塗四圍留瘡口俟根出稍長然後拔去再用藥塗海藏方單用殭蠶為末津調塗亦佳

治疔危篤者二服即愈輕者一服立效

土蜂房

一小窠全此物能利大小便

蛇蛻

一條全

用瓦器盛鹽泥固濟火煨存性研為細末每服一

錢空心好酒調下少頃腹中大痛痛止其瘡已化

黃水矣仍服后方

五聖散

大黃

一兩

生薑

皂角刺

金銀花

各二兩

瓜蒌

一枚

甘草

一兩

用好酒二升煎八分不拘時服

治疔瘡最驗 蒼耳 臭牡丹 各一大握搗爛新汲  
水調服瀉下黑水即愈 單用蒼耳葉搗汁和童便  
服一日三次立效

肘後方 疔腫垂死者一服立效 菊花葉紫莖者一握

搗取汁一升入口即活此神驗

根莖葉花皆可用

蒼耳散 治疔瘡累用神效

蒼耳根三兩五錢 烏梅五箇 帶鬚葱三根

用酒二鍾煎至一鍾熟服出汗後不散然後用勝

金散

勝金散 取鐵銹炒為末每服四錢或三五六錢用薤  
水滾過停冷調服不吐為佳

反花瘡

瘡有努肉凸出者是也

聖惠方治諸瘡努肉如蛇頭出數寸者硫黃末敷之即  
縮

肘後方 治瘡有肉突出烏梅燒灰敷立消

又方 白梅肉杵細入蜜捏成餅貼之妙

又方

馬齒莧燒灰研末猪脂調敷

瘡突出寸許根如小莖或大如梅者用花脚蜘蛛絲纏其根則漸乾而自脫落

又方

甘草

半生半炒

枯礬

人中白

密陀僧

各等分

右為細末以童便半盞用無灰酒和熬竹篦攪成膏塗瘡上日三五次

經驗方

胭脂

貝母

各三錢

胡粉

二錢半

白礬砂

沒藥

各二錢

為末先用溫漿水洗後服藥

雜瘡

諸惡瘡入心腹嘔逆藥食不下

菽豆粉

半兩

乾胭脂

三錢

定粉

二錢

為細末新水調下效

天泡瘡通聖散及蚯蚓泥畧炒蜜調敷妙若從肚皮起者裏熱發外速服通聖散



天行斑瘡須臾遍身皆戴白漿此惡毒氣永徽四年此  
瘡自西域東流於海內但煮葵菜葉以蒜蘆啖之即  
止

人面瘡 昔有人左膊有瘡如面歷試諸方惟後以貝  
母為末水調灌之數日乃結痂遂愈

足指内生鷄眼子 用鷄胃中食揩之餘者以石壓之  
立驗

天泡瘡小麥炒焦為末以生桐油調敷效若神速

治一切瘡疥神異膏

全蠍

去尾洗七枚

蛇床子

取末三錢

皂角

一錠

巴豆

去殼七粒

麻油

一兩

黃鵠

兩半

雄黃

另研末三錢

輕粉

另研五分

右先用全蝎皂角巴豆煎油黑色去粗入蠍化開  
取出俟冷入雄黃輕粉蛇床子末攪勻成膏每用  
少許搽瘡上須先以苦參湯洗過絕妙

苦參湯

苦參

蛇床子

白礬

荊芥

各等分煎湯溫洗

治漏瘡不收口 五倍子末 血竭末填塞之效

治一切瘡癰花散

葵花 梔子 黃連 黃栢 各等分

為末冷水調貼痛處

百合散 治頤頰瘡一名獨骨瘡

百合 黃栢 各一兩 白芨 二錢半 草麻子 五十粒

為末朴硝水和餅貼日三五次

面上耳邊生浸淫瘡久不愈出黃水

名香  
辦瘡

殺羊鬚

荊芥

乾棗

去核各  
二錢

俱燒存性研末入膩粉半錢每用少許清油調搽

先以溫湯淨洗拭乾塗藥二三次效 亦治大人

小兒兩脇生瘡

附子散

治冷瘡日夜發歇疼痛

附子

半兩炮  
去皮臍

川椒

去目

雄黃

研末各  
二錢半

枯礬

七錢  
半

右為末麻油調敷瘡上日二次

白蒺藜散 熱毒瘡癰痒心神壅躁

白鮮皮

白蒺藜

炒去刺

防風

去芦

川大黃

炒

赤芍藥

梔子 麥冬 條芩 玄參 桔梗 前胡 炙甘草

草

各一兩

為末每服二錢食後薄荷湯調服

七寶散 熱汗浸漬成瘡痒痛不止

黃耆 川歸 防風 荆芥穗 地骨皮 木通

各二兩

明礬

一兩

每用一兩水煎五六沸去粗稍熱溲淋患處拭乾  
避風東垣此方曾治推車客皮膚皴裂不任痛  
兩手不能執轅足不能履地因製此藥與之即效  
明日遂行自是屢用屢效

玉女英 治瘡痒痛

滑石

五分 菡荳粉 微炒  
分四兩

右末之用綿包撲上妙 一方加棗葉一兩

連翹飲 治諸惡瘡紅赤痛痒心煩口乾及婦人血風

赤斑圓點開爛成瘡痒痛流黃水

連翹 生地 川歸 括萎根 荊芥 黃芩 赤

芍 麥冬 瞿麥 木通 大力子炒 防風 山梔

川芎 甘草

各等分

每服五六錢水煎加燈心二十莖不拘時服

紫花地丁散 諸惡毒瘡腫痛如神

川歸 紫花地丁 大黃 赤芍藥 金銀花 黃

耆

各半兩

甘草根

二錢

每服一兩水酒各一碗煎服

水銀膏 月蝕瘡多在兩耳及竅邊隨月盈虛

水銀

二錢半

黃連末

胡粉

松脂

各半兩

猪脂

四兩

右先熬猪脂令沸入松脂諸藥及水銀攪令勻磁器收先以鹽湯洗淨塗上日三五度

治甲疽瘡疔瘰癧散

綠礬

燒赤五錢

盧會

一錢半

麝香

二分半

俱為末以絹袋盛包患指扎定以差為度



漆瘡 生蠟取黃塗之效

又方 湯浸茫硝冷洗之效 明礬湯洗亦妙

又方 生紫蘓擦之累效 又人乳汁敷之好

又方 乾荷葉一斤水一斗煮濃汁洗瘡上日三瘥

又方 無名異末水調服

代指 手指甲頭腫痛

烏梅肉并仁 研爛醋調稀入指浸之愈

升麻和氣飲 治瘡腫癰疥痒痛

升麻 桔梗 蒼朮 乾葛 甘草 大黃

煨各一錢 陳

皮

二錢

當歸

半夏

茯苓

白芷

乾薑

枳殼

各五

分白芍

一錢半

右作一服水煎服

當歸飲子

治瘡痒疥癬濕毒風燥

當歸

川芎

防風

白芍

生地

蒺藜

荆芥

各一錢半 何首烏

黃耆

甘草

各一錢

右作一帖水煎食遠服為末亦可

除濕散 大治一切風毒疥癬癩痒狀如癩風

苦參 何首烏 荊芥穗 蔓荊子 薄荷

各一兩 白

芷 烏蛇

酒浸一宿焙乾

天麻

川芎

防風

各半兩

右為末每服三錢酒調下日進三次六日一浴令汗出血氣宣通一月膚澤如故

一掃散 一切瘡疥但相對而生者便是不問乾濕痒痛日近年深用之立效

藜蘆皮

二兩

雄黃

五錢

輕粉

十帖

蚌粉

水粉

各一兩

為末用大鯽魚一對入麻油煎熟去魚攤冷調藥  
搽瘡 若效遲加信末少許研杏仁十粒近陰處  
勿加

消毒飲

丹溪云消毒  
散氣表藥也

防風

一兩甘草

二兩荊芥穗

三兩

大力子

四兩

每服五錢水煎服

治皮膚風熱遍身生癰疹 大力子 浮萍等分為末  
薄荷湯調下二錢日再

東垣云 每風瘡大風病相似好桑葉洗蒸一宿日乾  
為末白湯調服二錢

殭蠶散 治風遍身癢疹痛疼成瘡

白殭蠶

洗焙黃

為末每服一錢酒調服一日三次立瘥

衍義方 有人病遍身風熱細疹痒痛不可任連腦脛  
臍腹及近陰處皆然涎痰多夜不得卧

苦參末一兩皂角二兩水一大升揉取汁銀石器熬

成膏和苦參為丸如梧桐子大每服二十九溫水吞  
次日便愈

小兒面瘡通面爛無完膚膿水流漓百藥不效陳年臃  
豬脂不入鹽者敷之若神

治諸般瘡疥加減法 腫多加白芷開鬱 痛多加白

芷方解石 痒多加枯礬 陰囊瘡加吳茱萸濕多

香油調 乾痒出血加大黃黃連豬脂調 蟲多加

蕪荑錫灰栴檀藜蘆斑貓 紅色加黃丹 青色加

青黛在上加通聖散 在下部多用瀉川丸下之

脚腫多出血加血分濕熱藥

膿胞瘡 治熱為主帶燥濕

黃芩

黃連

大黃

各三錢

蛇床子

寒水石

二錢

黃丹

五分

白礬

錢一輕粉

白芷

無名異

各少許

木香

少許

痛者加

為細末麻油調搽

蟲瘡如癰狀退熱殺蟲為主

乾疥瘡開鬱為主加吳

茱萸

蕪荑

黑狗脊

殺蟲

樟腦

一錢

松脂

頭上多加之

白礬

雄黃 硫黃 水銀殺蟲 黃連 方鮮石一分 蛇床子定

殺 松皮灰膿多及栢油調  
搽濕多加之

疥癩瘡春 天發焦疥開鬱為主 不宜抓破

枯礬 吳茱萸各二錢 樟腦五分 輕粉十帖 寒水石二錢半 蛇

床子二錢 黃栢 大黃各錢 硫黃一錢 栢榔一錢

右為末 猪脂調搽

治癰疥濕瘡浸淫日久痒不可忍搔之黃水出瘡後復發取羊蹄根去皮細切熬熟以米醋和先洗淨傳上



一時再以冷水洗之日一傳瘥若為末傳尤妙

外臺秘要治疥取羊蹄根和猪脂塗上或着鹽少許即  
結痂愈

千金翼 治遍身風痒生瘡疥茵陳煎濃洗立效

衍義云有人患遍身生熱毒瘡痛而不痒手足尤甚至  
頸而止粘着衣被曉夕不得睡痛不可忍以菖蒲三  
斗剉日乾之為末布席上使恣卧其間仍以衣被覆  
之既不粘衣被又復得睡不五七日其瘡如失應手

神驗

浸淫瘡痛不可忍者發寒熱大薊末水敷瘡上乾則易之

外臺秘要 治卒發疥秘驗方 風化石灰和醋漿水調塗隨手即減 一法用石灰炒紅出火氣香油調敷 千金方淋石灰汁洗之

木香散 一切惡瘡多時不斂此能生肌肉止痛

木香

檳榔

黃連

各半兩

白芷

三錢

為末先洗每日一次乾搽有水出勿訝未效再搽  
又方加地骨皮先於瘡上用溫漿水洗濕拭乾  
上藥妙不可言概治下疳瘡如神

洗諸瘡疥 取冬瓜藤或皮煎湯洗妙

治風癩瘡黃水瘡此方神效

用新竹筒十箇內裝黑豆一層頭髮一層數層至滿  
以稻糠皮火煨之於火盆內週圍同火煨竹筒內汁  
滴出以盞接之搗翎蘸掃於瘡上數日即愈

神仙活命飲 治一切惡瘡癰疽腫毒

穿山甲

蛤粉炒黃  
色淨六分

貝母

去心  
八分

甘草節

六分

防風

去皮蘆  
五分

沒藥

六分

赤芍藥

六分

白芷

五分

當歸尾

一錢

乳香

一錢

天花粉

八分金銀花

一錢陳皮

三錢

右作一服用無灰酒一大碗慢火煎令出氣量上  
下食前後服如患人能飲酒者服藥後隨意飲三  
兩盃為妙詩曰

真人妙訣世間稀 一切癰疽總可醫

消腫如同湯沃雪

化膿立見肉生肌

消毒散 治一切惡瘡赤腫疼痛掃之如神

黃連

五錢

地骨皮

一兩

朴硝

三兩

右為末每用三五分水一盞煎至七分去渣停冷用鷄翎掃之立效

婦人陰瘡

仲景云少陰脉滑而數者陰中即生瘡狼牙湯洗之狼牙二兩濃煎以綿纏筋頭浸湯瀝洗陰中一日三度

治陰蝕瘡 洗塌散

甘草

一兩 乾漆

一兩

黃芩

地黃

當歸

芍藥

各二兩

龜

甲

五兩

右細切以水七升煮取一半去渣以綿帛納湯中  
用塌瘡處良久即易日二度每塌湯可作十里許  
即挹乾捻取甘濕散薄敷瘡上使徧可經半日又  
以湯塌塌訖如前敷藥 有一婢此疾蝕處作兩  
瘡深半寸用此湯并後甘濕散不經七日平復甚

效

甘濕散

蚺蛇胆

青木香

硫黃

鐵精

麝香

臨時加入  
綠麝辟蛇

毒若入早則  
蚺膽無力也

右等分為末每取一錢井花水調日再服先令便  
利了即以後方桃枝薰下部訖然後取藥如碁子  
安竹管內入下部中日再度

桃枝薰法

取東南桃枝五七枝將枝頭輕敲碎綿纏

之蘄硫黃末數轉令厚又截一竹筒先入下部中却將桃枝藥燒着入筒內薰之

仲景云蛇床子散濕陰中之主藥

蛇床子仁為末以白粉少許和勻相得如棗大納入戶中自然濕散

荳胚散 陰蝕瘡

菴豆粉

蝦蟆灰

各二錢半

胭脂胚

二錢

右為細末乾摻



沐浴長春散 男子下元陰濕久冷陰囊左右夜痒抓  
之則喜住之則痛成瘡流水為害甚苦此方極效  
及治婦人陰濕子宮久冷

牡蠣 蛇床子 破故紙 紫梢花 乾荷葉 官

桂 各等分

每用一兩半水一小鍋入葱白數莖煎八分先薰  
後洗却用後津調散

津調散 治妬精瘡婦人陰濕瘡膿汁淋漓臭爛

黃連

欸冬花

各等分

麝香

少許

為細末或先以地骨皮蛇床子煎湯洗軟帛拭乾

津調敷之 忌生湯洗

妬精瘡

青黛

欸冬花

等分

麝香

少許

為末先以桑白皮地骨皮煎湯洗軟帛拭乾津唾

調末藥敷

婦人玉戶疳瘡

及小兒走馬牙疳

活蜘蛛一枚以生薄荷葉或乾者包蜘蛛燒存性為末酒調服之妙妙如小兒走馬牙疳以此搽之效

### 癰

丹溪云初起發熱者防風通聖散去硝黃加浮萍皂角刺

羅太無何首烏散 若脾肺風毒攻腫遍身癰變成癰疹搔之成瘡或肩背拘急肌肉頑痺手足皴裂風氣上攻頭面生瘡及治紫白癰風頑麻風症

荊芥穗 蔓荊子 歲靈仙 何首烏 炙甘草

防風 車前子

各等分為末每服一錢食後溫酒調下白湯亦可  
癰在頸項間后延上至耳成濕癰他治不應以蘆薈一  
兩甘草半兩和勻先用溫漿水洗癰拭乾敷之效

一方

蘆薈 大黃 輕粉 雄黃 蛇床子 川槿皮

枳殼

為末先刮破癬醋調塗之

乾癬積年生痂疥搔之黃水出每逢陰雨即痒用狼毒末塗之

栢脂膏 治乾癬

栢油

一斤

黃臈

半斤

杏仁

四十粒

朴硝

一抄

右件鐵器內用老生薑葱白三根一順攪五七次煎沸濾過成膏搽之

又方 山荳根末臘猪脂調塗之

祛濕散 多年濕癬大有神功

蠶沙

四兩

薄荷

半兩

為末摻之或用生油調搽

羌活膏 治頑癬疥癩風瘡成片流黃水久不瘥

羌活 獨活 明礬 白蘚皮 硫黃 狼毒

各一兩

黃丹 白附子 蛇床子

各半兩

輕粉

二錢半

為細末油調成膏搽之

八寶散 治風癩松皮頑癬久不瘥神效

藿香 檳榔 破故紙 大腹皮 雄黃 輕粉

硫黃 枯礬

各等分為末油調搽日三五次痒即搽之

香疥藥 治風疥癬瘡黃水瘡牛皮癬

輕粉 水銀 樟腦 各三錢 大風子 四十枚 川椒 四十粒 杏

仁 二十粒 柏油 一對

為細末疥用絹包於瘡上熨之黃水瘡乾搽神效

一抹散 治乾癬不瘥

天南星 草烏頭

各用生者一枚

為末以羊蹄根搗取汁調塗不過三次妙絕

牛皮癬及久年頑癬神方

紅粉霜

五分

明礬

一錢

蜜陀僧

三錢

川槿皮

一錢

杏仁

去皮油

為末津唾調搽一日三次三日全愈

腳瘡皮厚如癬或流黃水黃水延處即爛浸淫年久不

愈者 此方屢試屢驗瘡癬俱佳

紅棗二枚去核將皂礬一錢納棗中以苧麻繫扎用



好酒二碗慢火煮成膏不要攪動膏成去棗不用以膏塗患處二三度全愈 若浸淫瘡初塗時略疼少刻便止其瘡就結乾痂妙甚

### 臙瘡

夫臙瘡者皆由腎臟虛寒風邪毒氣外攻三里之傍灌於陰交之側風熱毒氣流注兩腳生瘡腫爛疼痛臭穢步履艱難此瘡生於臙骨為重以其骨上肉少皮薄故難愈至有多年無已口開濶皮爛肉現臭穢可

畏治法當先取蟲然後敷藥如隔紙膏麝香輕粉散之類須翹足端坐勿多行履庶可全愈矣

隔紙膏 治內外疔瘡

當歸 白芷 黃連 五倍子 雄黃 沒藥 海

螵蛸 血竭 白芨 白欬 黃蘗 厚朴

已上各五錢

黃丹 乳香

二錢半 輕粉一錢半 研

右為細末用清油紙貼藥敷瘡上絹帛縛定有膿水鮮開刮去不潔再貼藥如此數次即愈須先用

燒鹽湯洗淨片帛拭乾待片時水氣乾然後貼藥

又隔紙膏 專治臙瘡如神務要用絹帛縛得着實貼

肉方好過兩日取抹淨翻貼之

滴乳

沒藥

各二錢

黃丹

炒紫

降真香灰

各兩半

已上俱

另為細末

真黃蠟

一兩

真蜂蜜

一茶盞

右將黃丹入銅鑊內炒紫色次下降真香灰末攪令勻却下蜜黃蠟另熬化傾入油蜜攪令極勻然後下乳香沒藥輕粉片腦再用銅匙攪之又勻待

藥稀稠得所取出磁碗收盛勿令泄氣臨用看瘡  
大小攤之油紙綿紙尤佳竹紙不耐藥在中紙在  
外翻覆貼之

治臙瘡久不愈

龍骨

二錢半

乾猪糞

半兩燒存性

輕粉

少許

栴榔

半兩

乳香

沒

藥

各一錢

右為細末先以燒鹽湯洗瘡以軟絹帛拭乾清油  
調敷瘡濕則搽之

秘傳隔紙膏 治年月深久膿瘡不愈者

老松香

樟腦

谷丹

炒

水龍骨

即舊船石灰

輕粉

久

不愈加

白芷

川芎

海螵蛸

總為細末鎔化松香加少清油和之以油紙隨瘡  
大小糊袋盛藥夾之用水洗淨縛在瘡口上二日  
定四日一換若單用白芷川芎螵蛸三味煎水洗  
之立效

屢驗方

枯礬

三錢

墨煤

一兩

煉存性

研勻以生桐油做隔紙膏貼之先以五倍子川椒  
葱三味煎湯洗拭乾貼藥一日一換七日全愈

又方 治似臙非臙

蜂蜜

四兩

嫩松香

一錢二分

先將蜜鎔滴水成珠次入松香末攪勻如上法做  
貼洗亦同

又方

麻油

二兩

熬至滴水成珠又將蜂蜜四兩熬至滴水成

珠將油攪入又將伏龍肝四兩為末入內攪勻成膏

先將瘡洗淨以膏塗之一日一二次其效甚速

又方

冬青葉

鰾豬膽

百草霜

二味和勻將冬青葉與本人嚼爛先將瘡用椒葱

湯洗淨乃以膽霜敷後却敷冬青葉三四次便愈

粉麝散

治內外臙臭爛數十年不愈者

生龜

一枚

去肉取殼醋一盃炙醋盡為度煨令白烟盡

存性以盃蓋在地上出火毒為細末入輕粉麝香拌  
勻臨用先以葱水洗乾敷藥妙絕妙絕

又方 新起未久者甚好

玉簪花葉小便浸貼一日一換五日愈

諸凡癰毒惡瘡多年臭爛成坑不收口者此方極佳一

七成功

乳香

沒藥


各五錢

天靈蓋

煨一兩



右為極細末搽之神靈鮑清溪之子患痘後腦癰  
肉爛成坑骨露不收口百藥無功敷此立效



赤水元珠卷二十九